

四庫全書

經部

欽定四庫全書

經部  
詩傳名物集覽卷九

詳校官監察御史<sub>臣</sub>莫瞻菴

刑部郎中<sub>臣</sub>許兆椿覆勘

總校官庶吉士<sub>臣</sub>何思鈞

校對官中書<sub>臣</sub>吳俊

謄錄監生<sub>臣</sub>羅翹遠

欽定四庫全書

詩傳名物集覽卷九

庶吉士陳大章撰

草

蒹葭蒼蒼

朱傳蒹似荏而細高數尺又謂之蘆葭蘆也孔疏初生為葭長大為蘆成則為葦又名離釋草蒹蘆郭璞曰似荏而細江東呼為蘆蒹陸疏水草也堅實牛食之肥強青徐人謂之蘆兗州遼東通語也說文蘆荏之未秀者

詩緝蒹一名蘆又名荻一物三名廣要曰蒹葭二物相  
類而異種蒹小而中實曰荻曰蘆曰蒹曰蘆曰華曰芳  
曰荻曰烏蘆皆蒹也葭大而中空曰葭曰蘆曰華曰芳  
曰馬尾皆葭也本草綱目蘆葦花皆名芳萌皆名蘆如  
竹筍可食所謂蒹今作蘆者是也所謂蒹今作蘆者是  
也埤雅蘆高數尺今人以為蘆箔因此為名蓋其萌也  
同時其秀也同時其堅成也又同時且同產河洲江渚  
間故詩人往往並詠如葭蒹揭八月荻葦及此篇是

也陸疏云蘆葦別草李巡認為一物朱子河廣注云葦  
兼葭之屬毛公大車傳蒹蘆之始生偶爾相混後人遂  
不能分別矣字說云荻強而蒹弱荻高而蒹下雖無實  
據亦頗得其形似易說卦傳為萑葦莊子欲惡之孽為  
性萑葦兼葭始萌以扶吾形尋擢吾性註葦之幼曰蒹  
葭長曰萑葦一物異名

視爾如莪

朱傳莪莼菜也又名荊葵紫色爾雅莪虺虺郭云荊葵

也似葵紫色謝氏云小草多花少葉葉又翹起古今注  
荊葵一名戎葵一名芘芣華似木槿而光色奪目有紅  
有紫有青有白有黃莖葉不殊但花色異耳一曰蜀葵  
陸疏芘芣一名荊葵似蕪菁華葉紫綠色可食微苦齊  
民要術葵有紫莖白莖二種春必畦種水澆冬種者有  
雪勿令從風飛每雪輒勞之令地保澤搗必待露解收  
必待霜降詩曰七月烹葵及菽是也左傳鮑莊子之知  
不及葵葵猶能衛其足羅氏曰荊葵比戎葵葉小花似

五銖錢大色粉紅有紫文縷之一名錦葵大抵似蘆葍  
花故陸云似蕪菁花釋草屑戎葵郭氏曰今蜀葵收此  
菜令荆葵其來各不同本草蜀葵中小花者名錦葵一  
名戎葵功用更强以此襍之蜀葵中而反得戎葵之名  
矣崔豹古今注其說戎葵蜀葵之狀可也混荆葵茈菜  
之名於內者非也然今人亦通呼此為蜀錦葵則從其  
類比附之耳埤雅爾雅曰莖葵一名繁露此又葵之一  
種蔓生葉圓而厚周官曰大圭尺三寸杼上莖葵首說

文云齊謂之終葵謂於杼上圓廣其首即禮記天子所  
搢之珽也濮氏曰芘茅紫荆春時開花葉未生花紫色  
自根及榦而上連接甚密有類蟻窩故爾雅字從蟲名  
蚘蚩俗曰火蟻花譜葵有十數種天有十日葵與終始  
故從葵一種錦葵又名苕又名苕茅叢低葉微厚花小  
如錢文采可觀又名錢葵色深紅淺紅淡紫皆單葉開  
亦耐久詩視爾如苕即此字說草能揆日向焉故又訓  
葵通雅按郭璞以苕為荆葵者為蜀葵鄭氏誤以荆葵



為蜀葵漁仲又誤以苜蓿為蜀葵荆葵似戎葵而紫稍小戎葵即蜀葵也一說紫荆花似五銖錢生幹上自根至杪如蟻窩故名猶荊蓺之名豕首綬草之名音鷗也可以漚紵

朱傳紵麻屬陸疏紵麻也科生數十莖宿根在地中至春自生不再種也荆揚之間一歲三收今官園種之歲再刈刈後便生剥之以鐵若竹挾之表厚皮自脫但得其裏韌如筋者謂之徽紵今南越紵布皆用此麻粗者

可為繩周禮典臬掌布總縷紵之麻草之物陸德明曰  
紵字又作苧張揖云三稜也說文草也可以為繩麻譜  
苧績麻也有二種一白苧一紫麻各處有之皮可績布  
高七八尺葉如楮夏秋間著細穗白色子茶褐色一科  
數十莖宿根在地到春自生每歲三刈過常麻三倍本  
草苧家苧也又有山苧野苧紫苧葉面紫白苧葉面青  
背皆白根可煮食救荒今俗呼苧為苧麻麻臬也臬與  
苧異種苧精白於臬故詩曰漚苧又曰漚麻漢書相如

賦蔣茅蔣菰也茅小粟也與苧殊類音義誤以為三稜  
舊註云茅與苧同則又誤中之誤矣紆通作苧義同

可以漚管

朱傳管葉似茅而滑澤莖有白粉柔韌宜為索也爾雅  
白華野管郭璞曰管茅屬白華箋人刈白華於野已漚  
名之為管未漚則但名茅也陸疏管似茅而滑澤無毛  
根下五寸中有白粉者柔韌宜為索漚乃尤善矣可為  
履管根赤茅根白濮氏曰左傳云雖有絲麻無棄菅蒯

蒯與管皆謂蒼也黃華者俗名黃芒即蒯也白華者俗名白芒即管也周書成王時會人獻以管山海經天帝之上其下多管又吳林山中多蕞草註管也異物志香管似茅而葉長大於茅不生洿下之地凡所烝享必得此管包果助調五味陸農師云爾雅曰白華野管其華白故一曰白華詩序曰白華孝子之潔白也南陔孝子相戒以養也詩曰白華管兮白茅束兮又曰英英白雲露彼管茅已漚者曰管白華不管則薄脆白茅不束則

散亂故詩以譬夫婦管與麻紵同義矣字說管物之柔  
忍者制而用之故謂之管茅自然之潔白故以供祭祀  
管漚蓄而柔忍故以為索綯幽王黜申后而立褒姒以  
妾為妻以孽代宗故詩人刺之曰白華管兮白茅束兮  
不以賤妨貴不以貴棄賤者人道也不以茅棄管不以  
管害茅者天道也李氏本草夏花者為茅秋花者為管  
二物功用相近名稱不同本草別錄不分二種謂茅根  
一名地管又出地筋一名管根蓋二物根狀皆如筋可

通名地筋不可並稱管也又翠管生水中似蔥空中名  
水蔥王維詩水驚波兮翠管靡注草可為席唐六典東  
牟郡歲貢蔥席六領通雅說文謂管即茅非也管大於  
茅葉似茭草花白穗旆旆然莖圓直宜為帚其弱柔忍  
宜為屨白芒不及黃芒芒又作惹爾雅惹杜榮郭注惹  
似茅皮可為繩索屨屨管赤根茅白根管可食牛茅不  
可食牛喪服傳曰蘆蒯之菲曲禮苞屨不入公門皆謂  
草穗之芒弱也異物志香管則又一種王伯厚以秉蘭

為管葢古聲借耳丹鉛錄管蔽作管蕢畝蒺藟

卽有旨茗

朱傳卽丘也茗茗饒也莖如螢豆而細葉似蒺藜而青  
其莖葉綠色可生食如小豆藿也爾雅茗陵茗黃華莖  
白華茱郭注茗華色異名亦不同茱音肺陸疏茗茗饒  
也幽州人謂之翹饒夏生孔疏茗之華傳云陵茗此直  
云茗草陵茗好生下濕此則生於高丘與彼異也詩緝  
此旨茗茗饒也非小雅茗之華所謂陵茗也廣要孔氏

以為好生下濕亦因陸疏誤認鼠尾為陵苕矣不知陵苕乃凌霄亦好生高阜者但二種俱不可食而旨苕可生食為異耳正字通苕有二小雅苕之華陵苕也即凌霄花好生高阜初蔓生依喬木歲久延引至顛開花劉禹錫云一名女葳通志云一名紫葳花不紫鄭箋以為花紫赤繁華衰則黃非也鼠尾草一名陵翹一名陵時即爾雅勤之別名與陵翹殊類孔穎達陸璣以陵苕為鼠尾以陵時陵翹即凌霄並非詩緝云陳風邛有旨苕苕



饒也非小雅陵苕也或溷為一舊注引爾雅翼闕旨苕  
爾雅連異翹注一名連苕此又與詩二苕同名異實者  
也

邛有旨鷖

朱傳鷖小草襟色如綬爾雅鷖綬郭璞曰小草有襟色  
似綬也鄭漁仲云疑即赤孫施草也陸疏鷖五色作綬文  
故曰綬草埤雅鷖綬鳥也故鷖有襟色似綬其字從鷖  
鷖善相其天而吐綬樂見其文采有戕賊之疑則不吐

也令綬鳥大如鸛鵒頭頰似雉有時吐物長數寸食必  
畜嗉臆前大如斗慮觸其嗉行必遠草木古今注吐綬  
鳥一名功曹令俗謂之錦囊戴侗曰鵒大如雞額下有  
錦囊鳴則囊見時珍云吐綬雞項有嗉囊內藏肉綬清  
明前後向日擺之項上先出兩翠角二寸許乃舒綬長  
潤近尺采色燦爛踰時不見或剖視之一無所有劉公  
瑾云鵒本鳥名亦名綬鳥咽下有囊如小綬具五色鵒  
草之名豈因其似而取義乎

有蒲與藺

朱傳蒲水草可為席者說文蒲水草似莞而編有脊滑柔而性溫可以作席弱蒲子可以為平席禮男執蒲言有安人之道也毛傳束蒲草也本草圖經水楊也又苻蒲一名蒲釐山南人謂之香蒲春初生時出水紅白茸茸然其入土白色者啖之甘脆宜為菹周禮深蒲是也其葉與弱如茭滑更可為薦周禮蒲筵是也蒲中心狀如匕柄者夏抽莖叢生花抱莖端蕊屑若金粉為蒲黃

甘平益氣力陸疏蒲始生中心入地者名弱蕒以苦酒  
浸之如食筍法埤雅蒲水草也說者以為上章言薪言  
楚則蒲不宜為草誤矣夫芻亦草也綢繆之詩曰束薪  
束芻束楚則豈以言木妨草哉魚藻曰魚在在藻依於  
其蒲葢魚遊者也據於藻依於蒲樂於藻安於蒲王者  
俯身以順萬物魚之所樂王亦樂焉魚之所安王亦安  
焉禮男執蒲璧註刻蒲形於璧象其安人之道也又明  
堂位周以蒲勺註合蒲如鳧頭也疏云刻勺為鳧頭其

口微開如蒲草本合而未微開也三禮圖如蒲穀璧悉作草稼之象令人發古冢得蒲璧乃刻文蓬蓬如蒲花數時穀璧如粟蒲耳義各有取即禮圖亦未可為據也又爾雅莞苻離其上蒿註西方人呼蒲為莞蒲蒿謂臺頭首也亦名蒲中莖為蒿用之為席大雅維筍及蒲鄭箋云深蒲也傳云蒲弱也周禮醢人深蒲醢鄭司農云深蒲蒲弱入水深鄭玄云始生水中子詩緝斯干下莞箋云小蒲則莞精蒲庵周書云潤濕不穀樹之竹葦莞

蒲礫石可穀樹之葛木以為絺綌

有蒲菡萏

朱傳菡萏荷華也爾雅荷其花菡萏其實蓮說文芙蓉  
花未發為菡萏已發為芙蓉埤雅萏為芙蓉秀曰菡萏  
暢茂曰華字說菡萏實若冒隨昏昕開闔一說草木華  
未發也非專指荷杜甫賦雲菡萏以張蓋張說華山銘  
菡萏森爽陸璣賦紅蕊發而菡萏皆借義形擬語

隰有萋楚

朱傳萇楚鉞弋今羊桃也子如小麥亦似桃爾雅萇楚  
鉞弋郭注或曰鬼桃葉似桃華白鄭箋羊桃也藤生子  
赤狀如鼠糞故亦名鼠矢兒童食之陸疏葉長而狹華  
紫赤色其枝莖弱過一尺引蔓草上令人以為汲灌重  
而善沒不如楊柳也近下根刀切其皮著熱灰中脫之  
可韜筆管鄭箋鉞弋之性始生正直及其長大其枝倚  
儼而柔順不妄尋蔓草木本草羊桃一名羊腸一名御  
弋生山林川谷及田野陶隱居云子細小苦不堪噉花

甚赤蜀本圖經葉花似桃子細如棗核多生溪澗令人  
呼為細子根似牡丹或曰一名楚葉埤雅有兩羊桃一  
種花實皆連理廣要長楚莖弱必蔓於草木鄭箋牽強已  
甚草木疏云花紫赤色圖經亦云花甚赤而景純農師  
俱云花白又矛盾矣按長楚類書有入木部者然據鄭  
箋陸疏其為草屬無疑戴合溪嘗論長楚絕非羊桃又  
閩中獼猴桃亦相類乃藤梨也閩人呼為陽桃

浸彼芭糧



朱傳苞草叢生也稂童梁莠屬也鄭注守田也俗呼鬼  
稻一穗之間得一二穀而已傳云稂非漑草得水而病  
也鄭箋云稂當作涼蕭艾屬易傳亦以稂當作涼然釋  
草不見草名涼者未知何據說文禾粟之采生而不成  
者謂董節節或從禾作稂陸疏禾莠為穗而不成則疑  
然謂之董梁令人謂之宿田翁或謂之守田正義曰鋤  
禾去非類莠既別是一物稂亦當別是一物故郭注云  
稂為莠類說文陸疏皆以為禾之未成者則是稂亦禾

矣何至與莠並稱乎羅氏曰狼惡草也與禾相襍故詩人惡之古以飼馬魯仲孫它馬餽不過狼莠謂此也詩稱不稂不莠注狼莠皆害苗按本草有狼尾草子作黍食之令人不飢似茅作穗生澤地程子云狼蕭著皆下澤所生廣志可作黍引爾雅益狼尾令人呼為狼茅子然則此物似是狼爾狼既有實如黍故能亂苗又莠今謂之狗尾草稂名狼尾則亦相類

爾雅苞稂也注令人呼物叢綴者為稂大雅敦彼行葦

方苞方體注苞甲未坼也如竹苞矣注叢生而固也商  
頌苞有三蘖注本也如山之苞叶下流又有韻音剖實  
方實苞叶秀好注穀種甲而未坼曰苞舊注苞本草名  
音莠今人混作包佩觿集云草名之苞不當為厥包之  
包按正韻包亦苞韻會通作包

浸彼苞著

朱傳著葦草也陸疏似賴蕭青色科生本草圖經生少  
室山谷今蔡州上蔡縣白龜祠旁其生如蒿作叢高五

六尺一本一二十莖至多者三五十莖生便條直異於衆蒿秋後有花出於枝端紅紫色形如菊用其莖為筮以知吉凶故謂之神物易著之德圓而神卦之德方以知神以知來知以藏往昔者聖人之作易也幽贊於神明而生蓍周官筮人上春相筮逸禮天子之蓍九尺諸侯七尺大夫五尺士三尺蓍千歲三百莖者先知也洪範五行傳著之為言蓍也百年一本生百莖此草木之壽知吉凶者也聖人以問鬼神焉論衡蓍碩也明狐疑

之事當問之博物志以老故知吉凶生千歲三百莖同  
本其上常有黃雲覆之易以為數史記著所生獸無虎  
狼草無毒螫褚先生云聞著生百莖者其下必有神龜  
守之其上常有青雲覆之傳曰天下和平王道得而著  
莖長大叢生滿百莖今世取著不能中古法度取滿六  
十莖以上長六尺者即可用以末大於本者為主次蒿  
次荆皆以月望浴之論衡著生七十歲生一莖七百歲  
生十莖神靈之物避也說原草植三百六十著為之長

范筠詩數奇不可偶性直誰能紆傳玄賦春邁德於青  
陽混百卉而萌生逮朱夏而修茂暨商秋而堅貞雖離  
霜而未凋與潛龜乎通靈埤雅蓍草之壽者也六十曰  
耆卦之別六十有四蓍數窮於此且蓍所指非極數也  
或曰重卦伏羲爾文王重卦奈何曰伏羲重卦重三畫  
於前文王重卦重六爻於後周官曰卜掌三易之法其  
經卦皆八其別皆六十有四故曰八卦成列象在其中  
矣因而重之爻在其中矣司馬遷曰伏羲至純厚作易

八卦西伯拘而演易揚雄曰易始八卦文王六十四易  
乾鑿度曰垂皇策者義伏羲用著則卦已重矣然世質  
民淳占法惟用七八六十四卦皆不動若乾止於乾坤  
止於坤不能變也夏商因之皆以七八為占連山歸藏  
是已後至文王世益澆薄占法始用九六蓋不如此不  
足應天下之變也今易是已六十四卦皆動傳曰周易  
以變者為占是也然則伏羲重七八文王重九六由是  
觀之伏羲文王皆重卦揚雄言伏羲作八卦文王六十

四名從其盛者言之耳

四月秀萼

朱傳不榮而實曰秀萼草名毛傳萼萼草也箋夏小正  
四月王萼秀萼其是乎物成自秀萼始正義云萼草書  
傳無文四月已秀物之鮮矣故鄭以王萼正與萼為一  
曰萼其是乎為疑之辭也月令孟夏王瓜生註今曰王  
萼生夏小正云王萼秀未知孰是鄭疑四月秀者當為  
王瓜而月令夏小正皆作王萼又生秀字異必有誤者



本草云蒨生田中葉青刺人有實七月采陰乾則又非四月矣物之成熟莫先於蒨故云自秀蒨始也曹氏云蒨今遠志也其苗謂之小草說文四月秀蒨劉向說此味苦苦蒨也名物疏蒨草毛公不云何物鄭疑為王蒨蔡邕月令章句曰蒨草名生於陵月令四月王瓜生鄭注王瓜草挈也月令云王蒨生夏小正王蒨秀呂覽孟夏王蒨生注善或作瓜瓠瓠也淮南子孟夏王瓜生注王瓜本草作蒨然則鄭以王蒨即王瓜而又以王瓜

為菱莢也呂覽淮南高誘一家之說而以為瓠瓢一以  
為菱莢則固自相矛盾矣考之本草王瓜一名土瓜生  
魯地平澤田野及人家垣牆間三月採陰乾均房間人  
呼為菟瓜爾雅曰黃菟瓜郭璞云似土瓜而土瓜自謂  
之鈎蒺姑蓋菟瓜別是一種也按本草明言王瓜一名  
土瓜則二物小異實一種耳王蒨又是一物蔡邕云生  
於陵本草云生田中且夏小正月令一以為王蒨一以  
為王瓜定非一也若枯樓自是果羸之實菰莢自在草

部中品之上陶隱居云鄭玄以王瓜為菝葜殊為謬矣  
曹氏則以為遠志據爾雅云蔓繞棘葜郭璞曰今遠志  
也本草云遠志味苦一名棘葜一名蔓繞一名細草四  
月採根葉陰乾圖經云根黃色形如蒿苗名小草曹氏  
以蔓繞之名偶涉於蔓又味苦合劉向之說故定為遠  
志嚴氏從之然不榮而實謂之秀遠志有花不得云秀  
矣且本草但言四月採根葉不云採實也或曰黍稷有  
華亦可曰秀然蔓繞花又以三月開不以四月若從鄭

氏以為王貲則實以七月採以為王瓜則王瓜亦有花  
五月方開花下結子亦不得以為四月秀也朱子闕而  
不說良亦有以漢書唐山夫人歌云豐草萋萋注云萋盛  
貌或者詩泛言草有盛秀者乎通雅狗尾之莠萋非遠  
志萋繞狗尾也曰莠猶狼尾曰稂也廣雅謂棘蕓為遠  
志苗曰小草似麻黃劉向說味苦一曰狗尾草按莠萋  
萋繞相去甚遠孔子惡莠之亂苗豈可以萋存兩可之  
說爾雅孟狼尾說文董節或作稂如狼尾皆有實如黍

號曰稂莠

七月烹葵及菽

朱傳葵菜名詩記葵承露也大莖小葉華黃紫色可茹  
公儀所拔是也葵生葉向日不令照根曹植表若葵藿  
之傾太陽雖不為回光然向之者誠也左傳七月則鮑  
牽仲尼曰鮑莊子之智不及葵葵猶能衛其足王禎農  
書葵陽草也為百菜之主備四時之饌可以防荒儉可  
以為菹腊周禮醯人饌食之豆其實葵菹羸醢特牲記

銅芼夏葵冬苴儀禮贊者一人執葵蒔授之主婦士虞  
禮夏秋用生葵春冬用乾豆繆襲祭儀夏祀和羹芼以  
葵周官曰大圭長三尺杼上終葵首終葵爾雅作蔞葵  
葉圓而厚故以象形齊民要術種葵三十畝勝十頃穀  
陶隱居云以秋種葵覆養經冬至春作子謂之冬葵至  
滑利春葵子亦滑葉尤冷利不可多食術家取此葵子  
微炒散著濕地遍踏之朝種暮生遠不過宿日華子云  
冬葵久服堅筋骨秋葵即是種早者四民月令正月可

種葵四月可收冬葵子六月六日可收葵中伏可種乾  
葵古者以葵為常菜左傳公儀休相魯茹園葵而美愠  
而拔之曰又奪園夫紅女之利乎莊子魯漆室女泣曰  
昔客逸馬踐園葵使吾終歲不飽葵道家之法十日一  
食葵葵性溫利所以調和五臟也圖經冬葵秋種春作  
菜茹蜀葵爾雅苻戎葵也花五色白者主疾瘡黃者塗  
癰小花者紫黃色爾雅蓂葵紫露也菟葵若黎有毛啖  
之甚滑爾雅所謂希也亦名天葵別有鳧葵荅菜也荊

葵菽苳菜也錦葵旌節花也大黃葵獨花向日葵也鄧潛谷曰葵十月種五月更種本草葵類多其可食者為菜葵古人采葵必待露解故曰露葵令人呼滑菜者是葵有紫莖白莖二種白者勝大葉小紫黃花最小者名鴨脚葵實大如指頂子輕虛如榆筴仁四五月種者可留子六七月種者為秋葵八九月種者為冬葵正月種者為春葵然宿根至春亦生又有野者古詩井上生旅葵是也



菽朱傳豆也采菽箋菽大豆也生民傳云荏菽戎菽也  
箋云戎菽大豆也史記棄為兒時好種樹麻菽麥月令  
孟夏之月天子食菽與雞菽為北方之穀雞為陽鳥亦  
水火相濟之義也左傳隕霜殺菽又人食半菽物理論  
菽者衆豆之總名爾雅戎菽謂之荏菽廣雅大豆菽也  
小豆荅也脾豆豌豆也胡豆降𧄨也豆角謂之莢  
其葉謂之藿小宛疏菽大豆也采其葉為藿以芼牛謂  
以鼎煮牛取其骨體置之於俎其汁則芼之以藿調以

五味乃盛之於鉶謂之鉶羹春秋說題詞菽者屬也春  
生秋熟理通體屬也菽赤黑陰生陽大體應節小變象  
陽色也范子計然曰五土之宜各有高下高而陽者多  
豆平而陰者多五穀東方多麥稻西方多麻北方多菽  
中央多禾援神契赤土宜菽呂氏春秋得時之菽長莖  
而短足其莢三七以為族多枝數節競葉蕃實大菽則  
圓小菽則搏以芳稱之重食之息以香如此者不蟲先  
時者必長以蔓浮葉疏節小莢不實後時者短莖疏節

本虛不實種植書春大豆次植穀之後二月中旬為上  
時三月上旬為中時四月上旬為下時歲宜晚者五六  
月亦得然地不求熟收刈欲晚鋤不過再美田欲稀薄  
田欲稠汜勝之書三月榆莢雨時高田可種大豆保歲  
易為宜古之所備凶年也大豆生戴甲而出種土不可  
厚厚則頂圻不能長達夏至後二十日尚可種小豆不  
保歲難得宜堪黑時種雅翼羞籩之實餽餌粉餐皆稻  
米黍米所為以其黏著故擣粉熬大豆以為表管子桓

公北伐山戎以戎菽遍布於天下注戎大也孫炎云大豆諸家或以為胡豆后稷播種豈應近舍中國之種而遠種胡豆乎穀譜大豆有黑青黃白斑數種今之赤豆白豆綠豆瑩豆皆小豆也白豆亦曰飯豆漢書所謂飯豆食芋魁者一種菰豆葉如大豆可作飯又黑豆中最細者曰稽豆料豆廣雅葉為之藿公食禮鉶牛藿羊苦黍薇當是烹豆葉以為羹耳名物解菽有收斂之意常膳也故可祀天地亦喻君子之德中原有菽言德足

以養人者天下之所歸也采菽采菽言取有德受之以  
法度也春秋定元年隕霜殺菽傳菽草之難殺者言殺  
則知百草皆死又周子有兄不慧不辨菽麥周子晉悼  
公也漢書歲饑民貧率食半菽言軍無糧以菽襍它穀  
食之前漢書令三輔太常郡得以菽粟當賦後漢光武  
紀野穀旅生麻叔尤盛叔與菽同

七月食瓜

爾雅𦵏𦵏其紹𦵏郭注俗呼𦵏為𦵏紹者瓜蔓紹亦著

子但小耳說文瓜蒰也在地曰蒰有數種皆蔓生本草  
經水芝者白瓜甘瓜也禮月令孟夏王瓜生注即黃瓜  
周禮地官委人掌蓄聚物瓜瓠芋葵廣雅冬瓜蒰也水  
芝瓜也其子謂之鰕瓜之所出以遼東廬江燉煌為美  
有龍蹄虎掌羊骹兔頭女臂密甯赬蜃狸頭白鬴無餘  
縑瓜也又有魚瓜大瓜如斛出涼州有青登瓜大如三  
升斗有桂支瓜長一尺龍肝瓜長一尺花紅葉素生水  
谷又瓜州出大瓜瓠入其中首尾不見瓜州在古燉煌

郡夏小正五月乃瓜乃者急瓜之辭也瓜也者始食也  
八月剥瓜蓄瓜之時也禮記為天子削瓜者副之巾以  
絺注副坼也四坼之覆以巾為國君華之中以綌注華  
中裂也為大夫累之注不覆巾也士寔之注去寔不斷  
庶人齧之晏子曰賜人主前瓜桃不削橘柚不剖此亦  
曲禮懷核之義杜僭竊之萌也禮婦人之贄瓜桃李梅  
盧謚祭法曰夏祠秋祠皆用瓜又仲冬行秋令則天雨  
汁瓜瓠不成注雨雪襍下曰汁龍魚河圖曰瓜有兩鼻

者殺人莊子朽瓜化為魚物之變也本草瓜蒂七月採  
圖經云即蛄瓜蒂也又有白瓜越瓜胡瓜埤雅瓜字象  
其實在鬚蔓之間禮郊特牲天子樹瓜華不斂藏之種  
也謂種以供一時之用非收斂久藏之種惡與民爭利  
也性少延輒腐種用戊辰日尤忌聞麝乃至一蒂不收  
又曰瓜祭上環註謂橫切之圓如環也舊說其忖謂之  
環環瓜之脫華處其當謂之蒂蒂瓜之繫蔓處蒂味小  
苦墨子曰瓜甘蒂苦天下物無全美也左傳齊侯使連



稱管至父戍葵丘瓜時而往及瓜而代故今呼相代為  
瓜期又梁宋就為邊令與楚鄰界梁邊亭數灌瓜而美  
楚希灌因搔梁瓜梁人欲報之就曰是構怨之道也因  
竊為楚灌楚王大悅謝以重幣稽聖賦曰瓜寒於曝油  
冷於煎俗云瓜近糯及酒氣則易爛猫蹋之其瓢便沙

### 八月斷壺

朱傳壺瓠也埤雅似匏而圓曰壺壺園器也故謂之壺  
亦曰壺盧古今注壺盧瓠之無柄者玄蜂若壺蓋取諸

此性善浮要之可以涉水南人謂之要舟鷗冠子曰賤生於無所用中流失船一壺千金以此又可為尊春秋傳樽以魯壺司尊彝曰秋嘗冬蒸饋獻用兩壺尊皆以質為貴者記曰器用陶匏貴其質也惠子曰魏王詒我大瓠之種樹之成而實五石以盛水漿不能自舉也剖之以為瓢則瓠落而無所容莊子曰今子有五石之匏何不慮以為大樽而浮乎江湖壺之為樽其來尚矣詩曰八月斷壺壺性蔓生披蔓斬之故曰斷也今其收法

八月冷露降輒先斷其根令其餘蔓飲之己日乃收尤  
堅成可用禮器壺居一夏商時總曰尊彝周制大備故  
蒸嘗饋獻凡用兩壺次於尊彝用於門內然壺之用方  
圜有異燕禮與大射卿大夫用壺卿大夫以直方為宜  
故用方士旅食以順命為宜故用圜聘禮八壺南陳六  
壺東陳東蠹以動出而有接南假以大顯而文明應物  
以相見之時也以壺為設蓋取諸此周禮司尊彝饋獻  
用兩壺尊壺與古用匏同義貴質也漢之匭壺非古制

也又壺蘆與瓠同俗作葫又畫壺令小兒所吹泥鼓有聲無調者蔬譜瓠江南名扁蒲就地蔓生苗葉花俱如葫蘆結子長一二尺夏熟亦有短者粗如人肘中有瓢兩頭相似味淡可煮食詩記壺枯者可為壺嫩者可供茹陸疏甘瓠可食就蔓取之洪舜俞云輪囷鶩鴨之瓠鬱屈龍蛇之芝劉彥冲詩漑釜熟輪囷香清味仍美一線解瓊瑤中有佳人齒

九月叔苴

朱傳叔拾也苴麻子也喪服注苴麻之有實者孔疏麻  
九月初熟拾取以供羹菜本草經麻無子曰臬有子曰  
苴味甘平主補中益氣久服肥健不老月令仲秋食麻  
與犬孟冬天子以犬嘗麻草譜苴麻子茶褐色收子作  
種須頭苴者佳大麻一名火麻一名漢麻雄者名臬雌  
者名苴五六月開細黃花成穗結實似蘇子而大周禮  
朝事之籩供蕢蕢麻子之連殼者月令所食之麻麻仁  
也蕢可供麻可食稍有分別春種者為春麻子小而毒

夏種為秋麻子可入藥海東毛羅島出麻子大如蓮子  
最勝上郡北地者大如豆南地者子小名物解苴所謂  
婦雀以苴之者已則棄焉所謂苴履者安可長也所棲  
者道而已非所以為存所謂土苴者此也所謂菽苴者  
其為穀苴而已故六穀弗貴焉廣韻苴履中草履藉也  
亦作蘆爾雅藎蘆郭注作履苴草疏云即蒯類可作履  
底又芭苴芭苴囊貨也管子天地苴萬物故曰萬物之  
橐孔叢子吾於木瓜見芭苴之禮行箋云以果相遺者

必苞苴之或葦或茅苴即藉也禮記飯醒而苴熟註苞也

黍稷重穧

朱傳先種後熟曰重後種先熟曰穧說文種先種後熟也穧疾熟也穧或从麥禾邊作重是重穧之字禾邊作種是種藝之字今人亂之已久周禮內宰上春詔王后帥六宮之人生種穧之種獻之於王鄭司農云先種後熟謂之種後種先熟謂之穧玄謂詩云黍稷穧穧是也

賈公彥云先鄭直云先種後種不見穀名後鄭意黍稷皆有種稂又云舍人以歲時縣種稂之種以共王后之春獻種司稼辨種稂之種

其始播百穀

說文穀續也百穀總名鄭箋祈來年百穀於公社月令天子祈來年於大宗大割牲社於公社及門閭臘先祖五祀禮三農生九穀又食用六穀管子大庭氏曰神農播穀因以苗為教先王禁山澤之作者將民於生穀也



又田中有木者謂之穀賊易日月麗乎天百穀草木麗  
乎土星經曰八穀星在五車北主星明則俱熟周書凡  
禾麥居東方黍居南方稻居中央粟居西方菽居北方  
物理論梁者黍稷之總名稻者漑種之總名菽者衆豆  
之總名三穀各二十種為六十種蔬果之實助穀各二  
十種為百穀故詩曰播厥百穀者衆穀之大名也周禮  
太宰九穀注先鄭云黍稷秫稻麻大小豆大小麥後鄭  
謂無秫大麥有梁苽膳夫王食用六穀注云稌黍稷粱

麥苽疾醫以五穀養其病注云麻黍稷麥豆職方氏揚  
州荊州其穀宜稻豫州其穀宜五種注云黍稷菽麥稻  
青州其穀宜稻麥兗州其穀宜四種注云黍稷稻麥雍  
州其穀宜黍稷幽州其穀宜三種注云黍稷稻冀州其  
穀宜黍稷并州其穀宜五種莊子吾欲取天地之精以  
佐五穀淮南子神農氏之治天下也甘雨以時五穀蕃  
殖月令五時食穀春麥夏菽季夏稷秋麻冬黍孟秋農  
乃登穀內則牛宜稌羊宜黍豕宜稷犬宜粱鴈宜麥魚

宜苽漢食貨志五種注麻金黍火稷土麥水豆木大戴  
禮云食氣者神明而壽食穀者智而巧范子計然曰五  
穀者萬民之命五土之宜各有高下高而陽者多豆平  
而陰者多五穀五木者五穀之先也捍其木盛者來年  
多種之萬不失一也禾生於粟或楊大麥生於杏小麥  
生於桃稻生於柳或楊黍生於榆大豆生於槐小豆生  
於李麻生於楊或荊穀梁傳一穀不升謂之歉二穀不  
升謂之饑三穀不升謂之饉四穀不升謂之康五穀不

升謂之大侵禮斗威儀曰歲凶穀不登君膳不祭肺馬  
不食穀淮南子汾水濛濛而宜麻濟水通和而宜麥河  
水中濁而宜菽雒水輕利而宜禾渭水多力而宜黍江  
水肥仁而宜稻漢食貨志種穀必襍五種以備災害董  
仲舒曰春秋他穀不書至於麥禾不成則書之以此見  
聖人於五穀最重麥禾穀譜云南人專呼稻為穀北人  
亦以麥黍之類為穀各從其所產耳曹氏曰傳言天地  
之精上為日月其下為五穀蓋五穀民之所天天地之

精華在焉昔者神農氏作天錫之嘉穀堯時得三十五穗夏異本同秀殷又同本異秀故伊尹稱南海之稻而管仲告其君以北里之禾為重信乎古帝王受命之符不可輕也

獻羔祭韭

朱傳韭菜名孔疏以時韭初出故薦之月令仲春天子乃鮮羔開水先薦寢廟注鮮當為獻說文一種而久者故謂之韭象形在一之上地也禮庶人春薦韭以卵

祭宗廟韭曰豐本以其不須歲種周禮醢人其實韭菹  
國策魏武侯謂徐無鬼曰先生居山林食芋果厭蔥韭  
以賓寡人久矣齊民要術韭高三寸便剪剪如蔥法一  
歲之中不過五剪凡剪不用日中故諺曰觸露不掐葵  
日中不剪韭是也埤雅韭性內生根喜上跳故種與葵  
同法而畦欲極深論衡曰地性生草山性生木故地種  
葵韭山種棗栗名曰美園茂林也韭者久也故祭宗廟  
用韭齏之美在白韭之美在黃黃未出土者皆貴其本

之豐也內則曰膾春用葱秋用芥豚春用韭秋用蓼蔥  
芥陰物也韭蓼陽物也雅翼首春色黃未出土時最美  
故云春初早韭冬末晚菘夏小正曰正月園有韭易稽  
覽圖政道得則陰物變為陽鄭注若蔥變為韭本草韭  
葷菜屬辛溫歸心安五臟除胃中熱莖名韭白根名韭  
黃花名韭菁俗名鍾乳草言溫補也北戶錄一種水韭  
生池塘中有二三尺者五六月可食不葷而脆雅翼物  
久必變故老韭為莧又蘇頌曰鄭玄言久道得利陰物

變為陽故葱變為韭可驗葱冷韭溫也漢書龔遂令民  
各種葱五十本韭薤一畦又郭林宗待客夜冒雨剪韭  
作炊餅令洛人皆效之晉書庾公就陶侃食韭每留白  
陶問何為云欲種陶嘆曰吾子非惟風流兼有為政之  
實世說誰謂庾郎貧案頭嘗有二十七種鮭菜蓋言三  
韭也韭割之即生與他草異

果羸之實

朱傳果羸枯樓也爾雅果羸之實枯樓孔疏枯樓如瓜



葉形兩兩相值蔓生青黑色六月華七月實如瓜瓣本  
草經枯樓根一名地樓一名果羸一名天瓜一名澤姑  
實名黃瓜主胃痺圖經根亦名白藥皮黃肉白三四月  
內生苗引藤蔓葉如甜瓜葉作叉有細毛七月開花似  
葫蘆花淺黃色實在花下大如拳生青至九月熟赤黃  
色有正圓者有銳而長者內有扁子大如絲瓜子殼褐  
色子綠多脂秋後掘者有粉可入藥中庸夫政也者蒲  
盧也註亦或謂之果羸埤雅細腰曰蒲一曰蒲盧細腰

土蜂謂之蒲盧義取諸此今蒲其根著在土而浮蔓常緣於木故亦或謂之果羸也傳曰在地為蕨在木為果詩曰不流束蒲蒲性輕揚善浮也

有敦瓜苦

朱傳苦瓜伊川經說云有敦圓成之狀瓜苦瓜之苦者釋名云一名錦荔枝本草俗名癩葡萄蔓延草木莖長七八尺有毛而澀葉似野葡萄花黃實大如雞子有皺紋似荔枝食物志苦瓜一名菩蓬一名君子菜味甚苦

然襍他物煮之他物不苦自苦而不以苦人有君子之德又諸藏性寒者多沈滯苦瓜性屬火以寒為體以熱為用其皮與子皆益人所在多有而南交及海外諸番國特珍之蓋其土產多甜物故喜食苦又其地火方炎上炎上作苦故人多以苦味解暑內則調味夏多苦周禮注夏多苦者南方火味夏多苦也李時珍云氣味苦寒無毒原出南番今閩廣及中土皆種之苗引蔓並如葡萄而小七八月開小黃花五瓣如碗形結瓜長四五

寸青色皮上癰如癰熟則黃色自裂內有紅瓢味甘可  
食南人以充蔬苦澀有青氣星槎勝覽云蘇門答刺國  
一等瓜皮若荔枝甚臭剖之如囊中酥甜可食疑即此  
種

食野之苹

朱傳苹蘼蕭也青色白莖如筋毛傳苹萍也鄭箋苹蘼  
蕭爾雅苹蘼蕭郭云今蘼蒿也初生亦可食陸疏葉青  
白色莖似筋而輕肥始生香可生食又可蒸食雅翼鄭

以萍生於水宜非鹿所食故易之曰賴蕭然古人以水  
草之交為麋則麋鹿亦食水草廣要曰毛以草為萍陸  
氏羅氏遂以為水上小浮萍且云鹿食且飲也鄭箋易  
之曰賴蕭孔疏朱傳俱因之萋蒿別是一種鄭漁仲亦  
誤又援神契並頭蓮曰華草王者德至地則華草感此  
又別是一物矣盧氏禕說云唐文宗言草非賴蕭鄭漁  
仲以草為萋蒿豈附會文宗耶王元美以萋蒿為賴則  
更牽強王遵巖譏陸佃取安石之說不從鄭箋而從爾

雅不知爾雅有萍又有苹鄭郭皆本爾雅遵巖未之全考耳

食野之蒿

朱傳蒿藋也即青蒿也爾雅蒿藋郭璞曰今人呼青蒿香中炙啖者為藋又蔚牡藋註無子者陸疏蒿青蒿也荆豫之間汝南汝陰皆曰藋爾雅又云繁之醜秋為蒿郭云春時各有種名至秋老成通呼為蒿有蓬蒿召南彼茁者蓬是也有青蒿小雅食野之蒿是也又白蒿有

水陸二種爾雅繁縹蒿即今陸生之艾蒿繁由胡即今水生之萎蒿又香蒿或作薌蒿一名蕭又賴蒿一名葦蘿蒿一曰角蒿莪蘿一名蘼蒿抱根叢生黃花蒿與青蒿相似色帶綠辛臭不可食俗以菴醬黃酒麴又牛尾蒿色青不白細葉直上狀似牛尾又馬矢蒿葉大如茺蔚花紅色白八九月實成俗謂之虎麻或謠為馬先晏子云蒿草之高者也故俗以根赤葉香者為晏子蒿埤雅云說文耄从蒿省蓋五十象艾六十象著七十象蒿

艾治也蒿亂也莊子曰是其於辯也將妄鑿垣牆而殖蓬蒿也管子曰今麟鳳不至嘉禾不生而蓬蒿藜莠茂鴟梟數至蓋言穢亂也爾雅翼莊子稱今之君子蒿目而憂世之患蒿細弱而陰潤最易棲塵故以為比言昧眼塵中而憂世也明堂月令違天時則藜莠蓬蒿並興然則蒿者蓋非農祥也博物志周時盛德蒿大以為宮柱名曰蒿宮筆談青蒿一類自有青黃兩種陝西綏銀之間蒿叢時有一兩株迥然青色土人謂之香蒿莖葉



與常蒿悉同但比常蒿色青翠一如松檜之色至深秋  
餘蒿並黃此蒿猶青氣稍芬香恐古人所用以此為勝  
通雅蒿之醜甚繁鹿食者為青蒿葉背面皆青所謂猧  
蒿所謂藪即今草蒿也按藪器厭切郭注云無子者據  
圖經云葉背青微似茵陳根白硬結實大如麻子食物  
本草云牡蒿三四月生苗葉扁有禿岐秋開細黃花結  
實大如車前子則藪固有子矣又藪說文重文作藪亦誤

食野之芩

朱傳苓草名莖如釵股葉如竹蔓生陸疏生澤中下地  
鹹處為草真實牛馬亦喜食之爾雅翼鹿鳴所食三物  
一曰革今蘗蕭始生香可食二曰蒿三曰苓皆香草蓋  
草木之臭味相同有同類食之之義廣要曰苓爾雅及  
諸書皆不載惟博雅云黃文內虛苓也此即本草黃苓  
一名經苓陶隱居云圓者名子苓破者名宿苓圖經云  
莖如箸葉從地四面作叢生似與陸疏不同種說文荃  
黃荃也苓草也引詩食野之苓並巨今切而分為二按

荃苓實一字兼野苓黃苓二義荃當為苓

卉木萋萋

朱傳卉草也爾雅卉百草草謂之榮榮而實謂之秀秀而不實者謂之英茲根也服虔通俗云草盛曰萃木茂曰葆說文卉音誨一作艸草木之通稱又草之總名上林賦卉然興道而遷義猶歛然也舊說今人多以三十之卉代之按書禹貢卉服詩百卉嘉卉通作卉不自今人始矣花木考草木之向陽生者性暖而解毒背陰生

者性寒而解熱在北者移之南不茂在南者移之北而必變橘柚凋於北徙石榴鬱於東移葶藶死於盛夏款冬華於嚴冬鳩食桑甚而醉貓食薄荷而暈芎藭久服而暴亡黃蘗襍荊芥而致死物不能違性人豈能違物哉卉譜蛇床似薜蘿薺尼似人參百部似門冬芡實似葶藶房葵似狼毒杜蘅似細辛以其相亂也楚詞云薺葉薺以盈室比讒佞滿朝也薺疾藜也薺薺蓐也薺卷薺也是之謂三惡草

南山有臺

朱傳臺夫須即莎草也爾雅臺夫須陸疏舊說夫須莎  
草也可為蓑笠或云臺草有皮堅細滑緻可為簦笠簦  
文臺一名山莎本草香附子即莎草根生田野二月八  
月採圖經香附子交州者大如棗近道者如杏仁苗莖  
葉都似三稜根若附子周匝多毛今近道生者苗葉如  
薤而瘦根如筋頭大通志臺即雲臺菜舊說以為莎草  
爾雅翼臺莎草可為衣以禦雨令人謂之蓑衣都人士

曰臺笠緇撮毛氏云臺所以禦暑笠所以禦雨鄭云以臺皮為笠夫臺但可為衣不可為笠古稱臺笠蓑笠自謂臺與笠耳不必合為一物也齊語令農時雨既至脫衣就功首戴茅蒲身衣襍襖韋昭曰茅蒲簷笠也茅或作萌竹萌之皮所以為笠不必臺矣又曰襍襖蓑薛衣也蓋以莎草為之今人作笠亦多用筍皮箬葉山海經曰三危之山有獸其豪如被蓑郭氏亦云蓑被雨草衣則蓑但可為衣不可為笠明矣臺一名夫須蓋匹夫所

須也一名水香稜羅源曰莎葉莖似三稜根周匝多毛  
一名雀頭香香附子也上林賦薛莎青蘋師古曰即今  
青莎徐廣曰蒹莎可染紫六韜蓑薛謂莎草雨衣晏殊  
曰莎耐水旱樂蔓延雖拔心隕葉弗之絕也埤雅莎草  
疏而無溫故从沙與內司服所謂沙同意詩曰臺笠緇  
撮又曰南山有臺臺菜草也其生也在物下其成也在  
物先有基之象故曰邦家之基藥譜莎葉如老韭葉而  
硬光澤有劍脊稜五六月中抽一莖三稜中空莖端出

數葉開青花成穗如黍中有細子其根有鬚鬚下結子  
一二枚轉相延生即香附子按本草有蒿侯莎一條又  
別立臺夫須一條分明二種舊說多謂臺即莎草本草  
又以莎即香附與爾雅異義矣

北山有萊

朱傳萊草名萊香可食者也爾雅釐蔓華郭注一名蒙  
華說文萊即釐也陸疏萊草名其萊可食今兗州人炆  
以為茹謂之萊炆一說即紅心灰翟菜沛人以雞蘇為



萊三倉以萊萁為萊皆名同物異者蔬譜萊一名胭脂  
菜一名鶴頂草生不擇地即灰藿之紅心者莖葉稍大  
嫩時可食昔人所謂藜藿膏粱即此孔疏周禮上地田  
百畝萊五十畝萊為草之總名非別有草名之為萊也  
又萊草似蓬一名落帚大可為杖范石湖云萊釐吳音  
並用草木疏萊藜也韻書萊釐藜三字音義通山海經  
泰山有草名藜如荻可為簞又藜莖老可杖原憲杖藜  
出應門杜詩清風獨杖藜又蒺藜茨也與此名同實別

詩傳名物集覽卷九

欽定四庫全書

詩經名物集

卷十一

詳校官監察御史臣英曉萊

刑部郎中臣許兆椿覆勘

總校官庶吉士臣何思鈞

校對官中書臣吳俊

校對官助教臣羅萬選

謄錄監生臣羅翹遠

謄錄監生臣李觀光

欽定四庫全書

詩傳名物集覽卷十

庶吉士陳大章撰

草

菁菁者莪

朱傳莪蘿蒿也爾雅莪蘿陸疏莪蒿也生澤田漸洳之處葉似邪蒿而細科生三月中莖可生食又可炰香美味頗似萑蒿廣志莪蒿蘆蒿本草唐注葉似白蒿花如瞿麥紅赤可愛子似王不留行黑色作角七八月採蜀

本圖經葉似蛇床青蒿等子角似蔓青實黑秋熟所在皆有之陳藏器云蘆蒿生高岡宿根先於百草衍義角蒿莖葉如青蒿開淡紅紫花花大約徑三四分花罷結子長二寸許微彎埤雅莪又曰角蒿蒿之言高也菁菁者莪在彼中阿喻人君長育人材猶大陵長育微草也小雅蓼蓼者莪匪莪伊蒿喻父母生我以為美材可賴以終身今乃不得其養以死也釋蟲曰蠶羅也釋草又曰莪蘿也蓋蛾所以生蠶莪亦所以覆而出之此義亦

謂之羅歟字說莪以科生而俄詩曰匪莪伊蒿匪莪伊  
蔚莪俄而蒿直蔚麓而莪細育材之詩正言莪者以此  
通雅莪即蘆蒿嫩時可啖以結角故曰角蒿

薄言采芑

朱傳芑苦菜也青白色摘其葉有白汁出脆可生食亦  
可炆為茹即今苦蕒菜宜馬食軍行采之人馬皆可食  
也陸疏芑菜似苦菜青州人謂之芑西河雁門芑尤美  
本草野苦蕒五六回拗後味甘滑於家苦蕒廣要朱傳

云苦菜陸云似苦菜則又一種矣顏氏家訓江南別有苦菜葉似酸漿其花或紫或白子大如珠熟時或赤或黑此菜可以釋勞郭景純注爾雅云此乃藏黃蔞也今河北謂之龍葵梁世講禮者以此當苦菜無宿根至春子方生既云可以釋勞宜乎人馬皆可食又云至春方生似合軍行之時或青州雁門以為芑江南無其名耶又山海經東始之山有木狀如楊赤理汁如血不實名曰芑可以服馬郭注以汁塗馬則馬調良

食我場藿

朱傳藿猶苗也爾雅園鹿藿其實菰注鹿豆根黃而香  
蔓延生說文藿亦之少也公食禮鉶芼牛藿注云藿豆  
葉也詩緝豆葉用以作羹或曰藿者苗之總名然苗雖  
言草之始生而藿則有所指如豆葉曰藿鹿藿九草之  
一非凡始生者皆稱藿也又音髓草木華敷貌藿藿藿通  
淮南招隱青松襟樹兮蘋草藿靡又漢鮑宣傳酒漿藿  
肉又藥名藿香說文又以藿為鹿藿一曰蒯屬徐鍇曰



說文誤合而論之藎乃芭聲莓子皆名藎藎一名鹿藎  
白葛亦名白兔藎則知藎為苗之總名也藎讀堅

無啄我粟

爾雅藎赤苗芭白苗注藎赤梁粟也芭白梁粟也又曰  
梁稷也注今江東呼粟為梁孫炎曰稷粟也說文粟禾  
子嘉穀實也粟之為言續也江東人呼為梁禮記獻粟  
者執右契又求仁者之粟以祀之周禮倉人掌粟入  
之藏注九穀俱藏以粟為主左傳鄭饑未及麥子展命

餽國人粟戶八鍾又晉饑秦輸粟於晉自雍及絳相繼  
命曰汎舟之役周書神農之時天雨粟神農耕而種之  
隰朋曰粟內甲以處中有卷城外有兵刃未敢自恃自  
命曰粟周禮旅師掌聚野之鋤粟屋粟閒粟而恤民之  
艱厄春頒而秋斂之春秋說題辭粟助陽扶性一變而  
以陽生為苗二變而秀為禾三變而粲然為之粟四變  
入臼米出甲五變而熟飯可食陽以一立為法故粟積  
一大分穗長一尺西者金所立米者陽精故西字合米

而為粟楊泉物理論凡種有強弱土有剛柔土宜強高  
莖而疎粟長穗而大粒呂氏春秋飯之美者不周之粟  
又曰山陽之稌稌粟也古今注曰麋稌也後漢書曰烏  
九國其地宜稌羅氏曰古不以粟為穀之名但米之有  
稌穀者皆稱粟今人以穀之最細而圓者為粟則粱是  
其類廣記有赤粟白莖粟黑粟張公班粟又有龍爪粟  
俗呼鴨爪稗一名穆子音衫味澀甘無毒補中厚胃仁  
山金氏云呂氏書說有穀曰粟無穀曰米按粟即所謂

穀也古人米與穀兼積米切用而易腐穀氣全而可久  
緩急兼儲後世軍儲獨以米故久即不可食本草粟米  
味鹹主養腎氣去脾胃中熱益氣陳者味苦主胃熱消  
渴利小便唐本注粟類多種而並細於諸粱北土常食  
與粱有別賈誼新書鄒穆公令食鳧雁必以秬無敢以  
粟於是求易於民二擔粟一擔秬吏請以粟食之公曰  
粟米人上食也奈何以養鳥且汝知小計而不知大害  
商君書金一兩生境內粟一十二擔死境外粟一十二

擔生境內金一兩死於境外國好生粟於境內金粟兩  
生倉府兩實國強王子年拾遺記東極之東有瓊脂粟  
白如玉柔滑如膏有龍枝粟枝屈曲似游龍有鳳冠粟  
如鳳之冠有雲渠粟叢生葉似芙蕖又圓嶠山有不周  
粟穗高五大其粒皎然如玉也穀譜粟米之連殼者本  
五穀之一梁屬也今以脫殼者為粟米一曰小米粟古  
文作𥽿象穗在禾上之形蓋梁之細者青梁穀穗有毛  
粒青米亦微青而細於黃白梁穀粒似青稞而少麤夏

月食之極清涼作飴清白勝餘米早則有趕麥黃八月  
黃老軍頭之類晚則有雁頭青寒露粟鐵鞭頭之類齊  
民要術云粟成熟有早晚苗稈有高下收穫有多寡性  
質有強弱滋味有美惡順天時量地力則用力少而成  
功多也李時珍云古者以粟為黍稷粱之總稱後人  
乃專以粱之細者名粟故唐孟詵言人不識粟要之粘  
者為秣不粘者為粟因呼粱為秣粟以別秣而配秣此  
北人之所謂小米也

言采其遂

朱傳遂牛藟惡菜也今人謂之羊蹄菜箋牛藟也仲春  
時生可采郭云今江東呼草為牛藟者高尺餘許方莖  
葉長而銳有穗穗間有華華紫縹色可淋以為飲疏縹  
青白色淋以水沃也陸疏今人謂之羊蹄似蘆菔而莖  
赤煮為茹滑美多啖令人下氣幽州人謂之遂鄭漁仲  
云藟即羊蹄菜張揖云莖羊蹄本草羊蹄一名東方宿  
一名連蟲陸一名鬼目一名蓄陶隱居云今人呼禿菜

即蓄音之訛詩云言采其蓄是也圖經生下溼地春生  
苗高三四尺葉狹長頗似蒿苳而色深莖節間紫赤花  
青白成穗子三稜若茺蔚夏中即枯根似牛蒡而堅實  
詩言采其遂或作蓄又一種極相類而葉黃味酢名酸  
摸爾雅所謂蘋蘩蕪郭璞所云似羊蹄一名蔞是也衍  
義遂葉如菜中菠蔕但無岐而色差青白葉厚花與子  
亦相似本草綱目遂蕒音遂蕒言能去水氣治十種水  
病說文蕒草枝枝相對葉葉相當長箋引釋氏沙羅以



葛為端正樹雖從草實樹也備考云史記飲苳藹藥葛  
為毒草皆傳會不經語名物疏箋云遂牛藟爾雅云藟  
牛藟則遂即是藟孔疏云釋草無文非也孫炎注爾雅  
云車前草一名牛藟考車前本草五名不云牛藟孫說  
誤圖經云蒿蔭俗名葦柳根咸陽山谷處處有之苗高  
三四尺葉青如牛舌而長莖青赤至柔脆夏秋間紅紫  
花根如蘆葍而長如人形者用之有神爾雅謂之遂廣  
雅謂之馬尾易謂之苳陸皆即此蒿蔭也有赤白二種

易曰莧陸夫夫莧與陸皆陰類也或曰此即葦陸今俗  
名葦柳根又名夜呼莫知其義荆楚歲時記三月三日  
杜鵑初鳴田家候之此鳥鳴盡夜口赤上天乞恩至葦  
陸子熟乃止然則葦陸子未熟以前為杜鵑夜鳴之候  
故曰夜呼又鄭樵通志指遂為爾雅之菲及蕒誤

言采其菑

朱傳菑菑惡菜也箋菑亦仲春時生可采爾雅菑菑郭  
云大槩白華根如指正白可啖又云菑菑茅蔬菑與蕒

茅一草也華白者即名菑華赤者別名葍茅亦猶陵茗  
華黃白異名也廣雅烏麤菑也陸疏河內謂之葍幽州  
謂之菑燕一名葍其根正白宜著熟灰中溫噉之饑歲  
可炆茹以禦飢漢祭甘泉或用之或云花葉有兩種一  
種葉細而花赤有臭氣一種葉大而花白復香風土記  
菑蔓生被樹而升紫黃色大如牛角二三同蒂長七八  
尺咭味如蜜按郭邢以花白者曰菑赤者曰葍茅博雅  
以為麤菑戴侗以菑之蔓即木通據爾雅曰菑富又曰

菑蔓茅無惡草蔕陸之說則毛鄭之言恐未可信而陸  
疏風土記為差近矣合溪云其蔓即木通此正名通草  
而俗所謂妝花之通草則通脫木也未知然否

### 田卒汚萊

朱傳汚停水也萊草穢也孔疏汚停水之名禮記曰汚  
其宮而瀦焉是也萊孔疏田廢生草謂之萊萊音賚泰  
韻周禮上地田百畝萊五十畝中地田百畝萊百畝楚  
茨云田萊多荒是也遂人注云萊休不耕者又除草亦

曰萊地官山虞大田獵則萊山田之野註萊除草萊蓋猶載柞之為去木也吳棫曰萊夫須也不知夫須乃南山有臺之臺與萊迥別

匪莪伊蔚

朱傳蔚壯莪也三月始生七月始華如胡麻華而紫赤八月為角似小豆角銳而長爾雅蔚壯莪某氏曰江河間曰莪邢氏曰蔚即蒿之雄無子者陸疏壯蒿也一名馬薪蒿本草馬先蒿陶隱居云一名爛石草唐本注云

藥如茺藟紅白色實八月九月熟俗謂之虎麻茺藟苗  
短小子夏中熟而初生二種極相似陸佃云藟大於蒿  
羅氏曰藟無子者今青蒿藥端皆作子如米大藟獨無  
耳詩緝云爾雅繫之醜秋為蒿藟即蒿之大者莪莖可  
生食烝食香美至秋則變為蒿藟矣藟古人皆以為無  
子故曰牡蒿而本草注云八九月有實圖經云入藥當  
用有子者為正未知何以矛盾通雅藟為牡蒿即齊頭  
蒿也甚臭曰馬矢蒿訛為馬先又訛為馬薪

是剥是菹

朱傳菹酢菜也毛傳剥瓜為菹也疏以米粒和醢漬菜也鄭箋剥削淹漬以為菹貴四時之異物禮祭義水草之菹陸產之醢周禮醢人掌四豆之實王舉共醢以七菹實之注韭菁茆葵芹落筍菁蔓菁茆鳧葵落箭萌筍竹萌也禮記恒豆之菹水草之和氣孔疏周禮場人祭祀供果蔬是祭必有瓜菹醢人豆實無瓜菹者文不具采蘩傳公侯夫人執蘩菜以助祭王后則苾菜菹通作

菹又澤生草曰菹淮南子懲沸羹者次冷齏冷齏夜話  
菹為百歲羹言雖至貧亦能具百歲可長享也又淹韭  
曰齏淹菹曰齏菹亦韭類齊民要術仲冬菜經霜如蕪  
青葵等襍乾之並為鹹菹得其和者作金釵色南人作  
鹹菹以糯米絲擣為末研胡麻和釀之菹既甜脆汁亦  
酸美

蔦與女蘿

朱傳蔦寄生也葉似當盧子如覆盆子赤黑甜美爾雅



寓木宛童郭云寄生樹一名蔦陸疏本草桑上寄生其實明目輕身通神一名寄屑一名寓木一名宛童一名蔦生弘農川谷桑樹上三月三日採莖葉陰乾凡桑槲櫟柳楊楓等樹皆有之此物自造化之氣而生別是一物也陶隱居云桑上寄生詩云施於松上方家亦用楊楓上者各隨其樹名之生樹枝間寄根在皮節之內葉圓青赤厚澤易折旁自生枝節冬夏生四月花白五月實赤大如小豆蘇恭云此多生槲櫟柳水楊

楓等樹上子黃大如小棗實九月始熟陶說非也圖經云寄生云是烏鳥食物子落枝節間感氣而生葉似橘而厚軟莖似槐枝而肥脆三四月開花黃白色六七月結實黃色如小豆

女蘿朱傳兔絲也蔓連草上黃赤如金釋文在草曰兔絲在木曰女蘿毛傳女蘿兔絲松蘿也陸疏今合藥兔絲子是也非松蘿松蘿自蔓松上生枝正青與兔絲殊異本草松蘿一名女蘿生熊耳山川谷松樹上五月採

藥性論松蘿能治寒熱吐客痰名物鈔菟絲名女蘿爾  
雅所云是也松蘿亦名女蘿博雅及本草所云是也古  
詩云與君為新婚兔絲附女蘿李善云二者異草毛公  
誤合為一此詩女蘿施松自是松蘿耳與兔絲了無涉  
釋文云在草曰兔絲在木曰女蘿亦非蓋兔絲蔓延於  
木也舊說上有兔絲下必有伏菟之根無此菟在下則  
絲不得生乎上然其實不屬也淮南子曰下有伏苓上  
有兔絲詩曰鶯與女蘿施於松柏言鶯之為物寄生而

女蘿浮蔓尚得施於松柏可以人而不如乎且姓同本  
而生族同支而出尤與寄生浮蔓者異矣故以此較正  
又曰兔絲無根而生蛇無足而行魚無耳而聽蟬無口  
而鳴皆自然者也爾雅翼女蘿兔絲實二物也皆附木  
上蔦寄生也葉似當盧子如覆盆子赤黑甜美廣雅云  
女蘿松蘿也菟丘菟絲也本是兩物今女蘿正青而長  
無襍蔓故山鬼云被薜荔兮帶女蘿蘿青而長如帶也  
何與兔絲事然兩者皆附木或有時相蔓亦未可知古

樂府云南山幕幕兔絲花北陵青青女蘿樹由來花樹同  
一根今日枝條分兩處唐樂府亦云兔絲故無情隨風  
任顛倒誰使女蘿枝而來強縈抱兩草猶一心人心不  
如草則古今多知為二物矣博物志魏文帝記諸物似  
亂者女蘿寄生兔絲兔絲寄生木上根不著地正此義  
也廣要爾雅埤雅及郭鄭諸家俱以為一物異名陸氏  
云女蘿非松蘿本草分兔絲入草部松蘿入木部與陸  
氏合然又云松蘿一名女蘿何耶

言采其芹

朱傳芹水草可食鄭箋芹菜也可以為菹采其水中者  
尚潔清也爾雅芹楚葵注今水中芹菜本草水芹味甘  
平養精益氣一名水英陶隱居云二三月作英時可作  
菹及熟淪食之又有渣芹可生噉別本注云芹有兩種  
青芹取根白色赤芹取莖葉並堪作菹圖經云生水中  
葉似芡荷花白色而無實根亦白色孟詵云水芹置酒  
漿中香美高田者名白芹周禮醯人加豆之實芹菹兔

醢呂氏春秋菜之美者雲夢之芹晉書立春日以芹芽  
蘆菹為菜盤相饋埤雅云芹潔白而有節其氣甚芬芳  
而味則不如蓴之美故列子以為客有獻芹者鄉豪取  
而嘗之蜚於口慘於腹也又野人食芹而美獻之君蔬  
譜一種黃花者毛芹也有毒殺人三八月食芹已蛟龍  
病舊說陸地亦生芹名旱芹色味並同又一種馬芹爾  
雅芡牛薺郭注似芹明與芹不同類羅願合芹薺為一  
非也况芹各方皆生謂以薺得名尤謬又芹一作荇晉

石崇傳每冬得韭薺薺即薺也亦作送陸德明曰古  
作斬舊註不知薺有祈勤二音薺送並音勤薺音其汎  
云水草分薺薺為二物誤

終朝采綠

朱傳綠王芻也淇澳毛傳綠王芻孔疏萊薺也郭云薺  
也今呼鵝腳莎本草唐注蓋草葉似竹而細薄莖亦圓  
小生平澤溪澗之側荆襄人煮以染黃色極鮮好洗瘡  
有效雅翼本草名蓋草俗亦呼淡竹葉所謂終朝采綠



者上林賦稱香草云掩以綠蕙被以江離張揖亦以綠  
為王芻則葦草香也而離騷云葦葦施以盈室以三者  
皆惡草詩緝王芻易得之草即葦葦也陸疏其莖葉似  
竹青綠色高數尺今淇澳旁生如草澀礪可以洗笏及  
盤枕利於刀錯俗呼為木賊彼土人謂為綠竹據此葦  
葦與綠竹別詩綠蒿作葦諸家誤以葦竹為草名說文  
長箋云當即竹也草中之王故曰王芻按葦非竹唐本  
草明言似竹而細箋未深考耳通雅曰似竹之草非一

綠亦一種即說文之蒹漢書盤綬晉灼註盤草出瑯琊似艾可染也蒹乃綠字音轉今北人呼綠為蒹古者貢草入染人故謂之王芻又曰蓋草菴蓐草即篇竹也按說文蒹草可以染留黃言間色也古樂府中婦被留黃即此一作流黃

終朝采藍

朱傳藍染草也爾雅歲馬藍郭云今大葉冬藍也疏今為澱者是夏小正五月啟灌藍蓼啟者別也陶而疏之

也灌者叢生者也記時也禮記仲夏令民毋刈藍以染  
注藍色青青者赤之母刈之傷時氣也此月藍始可別  
荀子青出於藍而青於藍水為之而寒於水漢記曰  
欲以素絲之質附近朱藍又蓼中之蟲豈知藍之甘乎  
精微論曰赤欲如白裏朱不欲如赫青欲如蒼璧之色  
不欲如藍鄭樵曰藍有三種蓼藍染綠大藍如芥染碧  
槐藍如槐染青三者皆可為澱蘇恭云藍實有三種一  
種圍徑三寸許厚三四分出嶺南名木藍子菰藍堪切

為澱本草經所用乃是蓼藍實其苗似蓼而味不辛者  
菰藍惟堪染青蓼藍不堪為澱惟作碧色圖經藍實人  
家蔬圃中作畦種蒔三四月生苗高三二尺葉似水蓼  
花紅白色實亦若蓼子而大黑色五六月採實即蓼藍  
也菰藍即爾雅所謂馬藍又福州有一種馬藍四時俱  
有江寧有吳藍二三月生如蒿葉青花白四民月令榆  
莢落時可種藍五月可刈藍六月可種冬藍漢官儀菱  
藍供染綠紋綬菱小藍也齊民要術種藍一同葵法藍

三葉澆之蔕治令淨五月中新雨後即拔栽之故夏小  
正曰五月蓄蘭灌沐藍蓼灌澆灌也沐劉沐也綠可以  
染黃藍可以染青皆婦人致飾之物也卉譜藍有數種  
大藍葉如萵苣而肥厚微白似擘藍色小藍莖赤葉綠  
而小槐藍葉如槐葉皆可作靛至秋煮熟染衣正用小  
藍又一種擘藍一名芥藍葉色如藍芥屬也南方謂之  
芥藍葉可擘食故北方謂之擘藍葉大如菰可作菹又  
可作靛染帛勝福青李氏本草云藍有五種各有主治

惟藍實專取之蓼藍其葉如蓼五六月開淺紅花子亦如蓼歲可三刈菰藍葉如白菰馬藍葉如苦蕒即郭氏所謂大葉冬藍者俗謂之板藍二藍花子並如蓼吳藍長如蒿花白木藍長莖如決明高者三四尺分枝布葉如槐淡紅花結角寸許纍纍如小豆角諸藍不同以之作澱一也別有甘藍河東隴西種食之甚香蘇恭之所云木藍乃馬藍也蘇頌之所謂馬藍乃菰藍也寇宗奭又以蓼藍實為大葉藍之實並誤通雅紅藍即紅花北

方有馬支山多紅藍北人采其花為臙脂故單于號其妻為閼氏音馬支博物志張騫得種於西域一曰黃藍

### 苕之華

朱傳苕陵苕也本草云即今之紫葳蔓生附於喬木之上其華黃赤色一名凌霄爾雅苕陵苕黃華葉白華發郭璞曰一名陵時鄭箋云陵苕之華紫赤而蘩陸璣亦言其華紫色而此云黃白者蓋就紫色中有黃紫白紫耳及其將落則全變為黃故詩曰芸其黃矣陸璣云一

名鼠尾生下湮水中七八月中華紫似今紫草可染皂  
煮以沐髮即黑葉青如藍而多華廣志苕草青色黃紫  
華十一月稻下種之蔓延盛茂可以美田葉可食本草  
紫葳一名陵苕一名茛華生西海川谷及山陽圖經云  
凌霄花也多生山中人家園圃亦或種時初作藤蔓生  
依大木歲久延引至巔而有華其華黃赤夏中乃盛雅  
翼此華亦彌絡石壁盛夏視之如錦綉不可仰望露滴  
目中有失明者卉譜凌霄野生者蔓纔數尺得木而上



金匱要略卷之二十一  
本草  
即高數丈蔓間鬚如蝎虎足附樹上甚堅牢久者藤大  
如盃春初生枝一枝數葉尖長有齒深青色開花一枝  
十餘朵大如牽牛花頭開五瓣赭黃色有數點夏中乃  
盈深秋更赤八月結莢如豆莢長三寸許秋深采之名  
物疏陵苕即凌霄也陸疏以為鼠尾爾雅云勤鼠尾注  
云可以染皐本草經云鼠尾草有白華者赤華者一名  
勤一名陵翹生平澤中四月採葉七月採華陶隱居云  
田野甚多人採作滋染皐圖經云苗如蒿夏生莖端作

四五穗穗若車前與陸說生下溼七月華可染皁者相似則陸誤以陵苕為鼠尾矣又或以紫葳為瞿麥根瞿麥即爾雅所為大菊蘧麥亦非也陵苕斷即女葳陸䟽全謬不可從

何草不黃

說文草部艸也從二艸又云草斗櫟實也一曰象斗子徐鉉曰今俗以此為艸木之艸別作皁字為黑色之皁按櫟實可以染帛為黑色故曰草通用為草棧字也爾

雅卉草疏別二名也又云蒹葭華榮疏別艸木榮華之異名也又云菱根攬橐含木謂之華艸謂之榮注榮而實謂之秀秀而不實謂之英方言蘇芥艸也江淮楚南之間曰蘇自關而西或曰艸或曰芥艸芥艸也東越揚州之間曰艸南楚曰莽易天地變化草木蕃又天造草昧禹貢兗州厥草惟繇徐州草木漸包揚州厥草惟夭洪範庶草蕃廡大戴禮云孟春冰泮百草權輿周官雞氏掌殺草春始生而萌之夏至日而夷之冬至日而

耜之若欲其化也則以水火變之禮記孟春草木萌動  
季春生氣方盛勾者畢出萌者盡達孟夏靡草死季夏  
大雨時行燒薙行水利以殺草季秋草木黃落又腐草  
化為螢祭統嘗之曰草艾則墨未發秋政則民弗敢草也  
註因其枯槁之時艾以給爨艾草謂之草猶采桑謂之  
桑不曰艾草而曰草艾者草自可艾也艾音刈與刈同  
墨則五刑之輕者言草艾行墨刑也展禽曰春風鼓百  
草敷尉吾不知其茂也秋霜降百草零落吾不知其枯

也左傳僖三十三年隕霜殺草記異也又蔓草猶不可除又一薰一猶十年尚猶有臭注薰香草猶臭草言不可同器也淮南子醴泉生皇華皇華生庶草師曠占云歲欲豐甘草先生薺也歲欲苦苦草先生蒺藜也歲欲疫病草先生艾也博物志天老曰太陽之草名黃精餌之可以得長生太陰之草名鉤吻食之入口立死人能信鉤吻之殺人不信黃精之益壽不亦惑乎字通按艸草二字經史互見義通漢書晁錯傳少茅臣無識知董

仲舒傳朱小生古草艸中合為一又櫟實之草從阜草  
木之草通作草舊說繁碎不可從

縣縣瓜瓞

朱傳大曰瓜小曰瓞瓜之近本初生者常小其蔓不絕  
至末而後大也爾雅瓞瓞其紹瓞舍人曰瓞名瓞小瓜  
也紹繼謂瓞子漢中小瓜曰瓞孫炎曰瓞小瓜子如瓞  
其本子小紹先歲之瓜曰瓞說文曰瓞也與瓞同邢昺  
曰瓜本有二種大者瓜小者瓞而瓜蔓近本之瓜必小

於先歲之大瓜以其小如昶故謂之𪗇𪗇是昶之別名  
又地芝瓜也其子謂之𪗇詩傳小瓜連大瓜在枝間以  
喻子孫承嗣也

堇荼如飴

朱傳堇烏頭也爾雅芡堇草郭云即烏頭也江東呼為  
堇音靳晉語驪姬置鴆於酒置堇於肉賈逵曰堇烏頭  
也國策人之飢所以不食烏喙者以其雖偷充腹而與  
死同患也廣雅附子一歲為薊子二歲為烏喙三歲為

附子四歲為烏頭五歲為天雄本草烏頭與附子同根形似烏鳥之頭蜀人謂烏頭苗為董草冬採為附子春採為烏頭味辛甘溫大熱有大毒一名奚毒一名即子一名烏喙陶隱居云春時莖初生有腦形似烏鳥之頭故謂之烏頭有兩歧共蒂狀如牛角名烏喙喙即鳥之口也吳氏本草烏頭一名葭一名千秋一名毒公一名果負一名耿子禹錫等云正月始生葉厚莖方中空葉四面相當與蒿相似圖經烏頭烏喙天雄附子薺子都



是一種苗高三四尺莖四稜葉如艾花紫碧色作穗實  
小黑如桑椹本只種附子熟後有四物長三二寸為天  
雄附子旁尖牙角為薊子絕小者亦名薊子元種者為  
烏頭其餘大小皆為附子毛傳堇菜也詩緝郭氏謂堇  
即烏頭則與鳩毒同類非茶菜可食之類矣茶雖苦得  
霜甜脆故可言如飴烏頭毒物不可食何由知其如飴  
乎毛氏以堇為菜不言毒物內則堇薑粉榆注云薑似  
堇而葉大公食禮銅芼皆滑注云滑堇薑之屬說文堇

根如薺葉如細柳炰食之甘爾雅齧苦堇郭云今堇葵也葉似柳子如米泔食之滑者又一種紫堇名赤片亦名楚葵寶藏論云赤片生水濱葉形似赤芍藥上有黃斑汁可制汞伏硃砂號起貧草真君本草云赤片莖葉似蕎麥根味苦酸江淮人采苗充蔬食本草堇汁味甘唐本注此菜野生非人所種俗謂之堇菜葉似蕞花紫色名物疏爾雅齧苦堇本草在菜部毛公所云堇菜指此若烏頭則但可謂之草不可謂之菜也陸氏釋文又

引廣雅云董藿也今三輔之言猶然此爾雅所謂拜蒚  
藿非此董也按董茶惡菜詩言如飴以見周原風土之  
善耳必謂董為毒草與茶不類矣詩緝辨之甚當舊本  
有董董二字董註草名即烏頭董註草根如薺烝食之  
味甘董具各切董居隱切亦似傳會不可從

豐水有芑

朱傳芑草名按詩有三芑一穀一菜一草也毛氏以采  
芑為菜豐芑為草糜芑為穀王氏合三者皆以為穀非

是或曰豐芑之芑亦指菜言非別有草名芑也他若地黃之有芑名山海經之有芑木與詩三芑異物同名

實穎實粟

朱傳穎實繁碩而垂末也粟不秬也說文穎禾末也孔疏禹貢三百里納秸注秸穎也則穎是禾穗之挺書序唐叔得禾異畝同穎史平原君傳毛遂曰脫穎而出注雖芑也禮少儀刀卻刀授穎又士才能拔類者亦曰穎皆與此同義也粟是穀穗成就之穎其實粟然桓六

年左傳云奉酒醴以告曰嘉栗旨酒服虔云穀之初熟為栗小爾雅禾穗謂之穎截穎謂之銍

維秬維秠

朱傳秬黑黍也釋草秬黑黍李巡曰黑黍一名秬黍雅翼古者薦籩有白黑形鹽白為熬秬黑黍即秬也左傳黑牡秬黍以享司寒蓋用以藏冰也又以為酒謂之秬鬯召穆公平淮宣王策命之詞釐爾圭瓚秬鬯一卣書洛誥秬鬯二卣又文侯之命秬鬯一卣瑞應圖后稷播

植天降秬秠孔叢子魏王問子順曰昔上天神異后稷為之下嘉穀周遂以之興

秬朱傳黑黍一稊二米者也釋草秬一稊二米李巡曰黑黍之中一稊有二米者別名為秬孔疏郭璞曰漢和帝時任城生黑黍或三四實實二米得黍三斛八斗則秬是黑黍之大名秬是黑黍之中有二米者鄭邠人注云秬如黑黍一稊二米答張逸云秬即皮其稊亦皮也本草圖經秬黍之中一稊二米者得天地中和之氣乃

生米粒皆勻無大小得此然後可定鐘律令上黨或值  
豐歲往往得之但稀濶不能充貢雅翼鄭氏釋邕人以  
秬之壯襍於秠郭氏解釋草以秬之色襍於秠郭又引  
漢任城生黑黍詩歌后稷降播乃民事之常如必待任  
城所生而後降則沒世不可待矣按今百穀一稊二米  
者惟麥為然說文解秠亦云一稊二米而解來字云周  
所受瑞麥來麤一來二縫然則秠正來麤爾但生民臣  
工所稱不同來麤又為釐麤古者來釐秠三字相通

維糜維芑

朱傳糜赤梁粟也釋草蒙赤苗郭云今之赤梁粟  
芑朱傳白梁粟也釋草芑白苗郭云今之白梁粟與蒙  
皆好穀六書故俗作床鄭剛中曰岐山之陽種床尤盛  
米類稷可麪可餅西人飽麪非床猶飢也

不可救藥

說文治病草凡金石草木之劑皆曰藥炎帝外紀民有  
疾病未知藥石神農氏始味草木之滋察寒暑平熱之



性君臣佐使之義作方書以療民疾禮月令孟夏聚蓄  
百藥周禮疾醫以五藥養其病注草木蟲石穀也瘍醫  
凡藥以酸養骨以辛養筋以鹹養脈以苦養氣以甘養  
肉以滑養竅本草經上藥養命以應天中藥養性以應  
人下藥治病以應地藥有陰陽配合子母兄弟根莖華  
實草石骨肉三皇紀神農嘗百草一日遭七十二毒始  
有醫藥圖經藥分三品以三百六十五種應周天之數  
自漢以後代有增益史記古之聖人不居朝廷必居醫

卜之間本草序天造地化而草木生剛交於柔而成根  
苗柔交於剛而成枝幹葉萼屬陽華實屬陰得氣之粹  
者為良得氣之戾者為毒有五行焉曰金木水火土有  
五氣焉曰香臭臊腥膻有五色焉曰青赤黃白黑有五  
味焉酸苦甘辛鹹有五性焉曰寒熱溫涼平有五用焉  
曰升降浮沈中

其菽維何

朱傳菽菜穀也對肉穀故云菜穀謂菹也周禮聚斂蔬

材注百草可食者通作蔬釋器菜謂之藪不熟曰饅乳  
蔬藪者菜茹之總名月令仲秋之月命有司趣民種菜  
六書故今俗謂蔬蔬藪一聲也

維筍及蒲

朱傳筍竹萌也爾雅筍竹萌說文竹胎也天官醢人箘  
菹雁醢筍菹魚醢邢疏竹初萌生謂之筍凡草木初生  
謂之萌又爾雅云箘萌郭注萌筍屬也鄭注箭竹筍也  
通志凡筍惟箭筍為美故會稽竹筍有聞焉陸疏筍皆

四月生惟巴竹筍八月九月生始出地長數寸鬻以苦  
酒豉汁浸之可以就酒及食呂覽味之美者越駱之茵  
注越駱山名茵竹筍也筍亦曰茵箭箴筍禹貢之篠爾  
雅禮器之竹箭也本草筍木性甲乙氣筍譜竹初種根  
食土而下求乎母也及擢筍冒土而上愛乎子也筍青  
綠色萌筍籊筊筊筍別名杭州筍大如桶墮地即碎  
南岳筍黑而肥多汁天目廬山多黃竹拳筍甌越筊筍  
筍七八月生雲南筊筍七月生至十月稍苦巴州筍九

月生雪竹筍五月生方竹筍八月生浙閩以南四時皆有之又酸筍出越南桃竹筍出川廣四寸一節可為蓆李英公本草竹筍性甘無毒主消渴利水道益氣可久食道書筍者日華之胎也一名大明服日月之精華欲得常食蘇子瞻曰竹之始生一寸之萌耳埤雅其萌曰筍竹筍也从勺从日解之曰旬內為筍旬外為竹今俗呼竹為妬母草言筍旬有六日而齊母其自死筍為仙人杖唐人食筍詩稚子脫錦綳駢頭玉香滑注稚子竹

筍也以竹稱孫故有龍孫稚子諸號贊寧禪志云竹根有鼠大如貓名竹豚色類竹亦名稚子俗謂竹溜子玉篇云鼈也色深褐與竹色別新知錄謂泰順縣竹豚生林中食筍根形似豬掘食味美三說各異好奇者遂引此為唐人稚子之證謬矣

蒲朱傳蒲弱也鄭箋深蒲也毛傳蒲弱也周禮醢人深蒲醢醢鄭司農云深蒲蒲弱入水深鄭元云深蒲蒲始生水中子孔疏醢人加豆之實有深蒲筍菹蒲初生水

中入地弱大如匕柄正白生噉之甘脆

如彼棲苴

朱傳棲苴水中浮草棲於木上者言枯槁無潤澤也毛  
傳水中浮草鄭箋樹上棲苴孔疏苴是草木之枯槁者  
故在樹未落及已落為水漂皆稱苴也爾雅茵蘆郭注  
作履苴蘆與苴通草疏云即蒹類可作履底又包苴貨  
囊也賈誼策冠雖敝不以苴履楊賜上封事曰讒夫昌  
則苞苴通又禮喪服小記苴杖註苴者黧也惡貌也皆

宿草枯槁之義

彼疏斯粃

朱傳疏糲也粃則精矣孔疏以疏對粃則麤於粃也麤  
於粃者惟糲米耳言小人與君子如疏如粃其分審矣  
易傳以賢者食麤昏祿之黨食精也或曰疏粃皆糲屬  
粃次於疏與糲鑿精米別疏與粃皆喻小人左傳菜食  
不糲音毀或作鑿字林以糲為精米則糲與鑿皆米之  
精者鑿當倍精於糲也由九章算法推之米粗甚曰糲



疏即糲也。糲次之精者分三等。上曰粢。宗廟所用也。次曰粢。又次曰糲。按九章算術云：粟率五十，糲米三十，粢二十七，粢二十四，御二十一。言米漸細，故類益少。四種之米，皆以三約之，故得此數也。朱子曰：九章粟米之法，糲十，粢九，粢八。侍御七，糲米一斛，治而成粢，則九斗矣。張宴曰：一斛粟舂七斗米，為糲。與算說小別。說文：粟重一擔，為一斛。六斗有斗之大半，舂為米一斛。曰糲，糲一斛舂九斗。曰粢，稻重一擔，為粟二十斗，為米十斗。曰糲。

為米六斗有斗之大半曰粢據此則稗精於疏而糲粢  
視稗為尤精矣漢志小說謂之稗說漢藝文志小說出  
於稗官注王者欲知閭巷風俗之事故立是官師古曰  
小官也又張蒼定律令有罪者婦人坐使擇米正白為  
白粢供祭祀之用杜詩精粢儲白粢即此

貽我來牟

朱傳來小麥牟大麥也說文秋種夏熟相繼續之穀也  
來麤象芒束之形天所來也韓詩作貽我嘉麥鄭箋武

王渡孟津白魚躍入於舟出涘以燔後五日火流為烏  
五玉以穀俱來書說云烏以穀俱來紀后稷之德也雅  
翼古稱下田宜稻麥今小麥例須下田大麥則不然詩  
所謂青青之麥生於陵陂者謂大麥也麴者周所受瑞  
麥來麴也一作牟又作麥即今大麥劉向傳作貽我釐  
麴以為釐麴麥也然則來牟一物惟廣雅以麴為大麥  
來為小麥趙岐孟子注麴麥大麥也本草小麥味甘主  
除熱止燥渴養肝氣以作麴作麴溫大麥味鹹主消渴

除熱益氣調中為五穀長注大麥今裸麥一名麩麥形似小麥皮厚故謂大麥歐陽本義云牟者百穀中一穀耳自漢以前已有此名故孟子亦言麩麥然言麩又言麥明非一物蓋麩類也後世以麥不宜有二名因以為大麥理尚可通毛鄭乃據河內女子偽秦誓以穀俱來之說指以為麥而苟欲遷就來牟之說其可信哉爾雅所載諸穀之名甚多獨無來牟之說旁考六經牟無訓義多是人名地名然則闕其不知可也通雅來牟為釐

薺說文一來二縫秬一稭二米則秬即來薺也劉向封事作釐薺者古來釐秬三字相通方言江淮謂之繇北燕謂之豸關西謂之狸彼雖說獸而以一各通三音則此物亦然

予又集于蓼

朱傳蓼辛苦之物也爾雅薺虞蓼䟽即蓼之生水澤者頌云以薺荼蓼毛傳蓼水草是也禮記膾秋用蓼濡豚包苦濡雞醢醬濡魚卵醬濡鼈醢醬實蓼鵲羹雞羹鴛

釀之蓼皆實蓼於腹中後世飲食不用惟造酒者取其  
汁其粹者毒取溪魚即茶毒也蜀本圖經蓼有紫赤青  
馬水香木等七種紫赤二蓼葉小狹而厚青香二蓼葉  
相似而俱薄馬水二蓼葉大上有黑點木蓼一名天蓼  
蔓生葉似柘葉諸蓼花皆紅白子皆赤黑木蓼花黃白  
子皮青滑又有木天蓼生天目四明山樹似梔子冬日  
不凋又有藤天蓼著樹生葉如梨光而薄子與木天蓼  
同又三茅君有白蓼醫方又毛蓼生山麓葉上有毛冬

根不死埤雅蓼生水澤者莖赤味辛一名蕎成王初惑  
管蔡而疑周公四國之亂幾毀王室則嘗集于蓼矣悟  
而後患故曰予又集于蓼言辛苦也離騷曰蓼蟲不  
能从乎葵藿則葵藿甘而蓼苦故也吳越春秋越王念  
復吳怨卧則切之以蓼冬則抱冰夏則附火言其刻志  
如此戰國策蓼蟲在蓼則生在芥則死非蓼仁而芥賊  
也卉譜一名水荭花其類甚多有青蓼香蓼花皆紅白  
子大如胡麻赤黑而尖扁惟木蓼花黃白子皮生青熟

黑人所堪食者三種一青蓼葉圓者勝一紫蓼相似而色紫一香蓼相似而香並不甚辛可食一云青者蓼紫者茶

以薺茶蓼

朱傳薺去也茶陸草蓼水草一物而有水陸之異也今南方人猶謂蓼為薺茶或用以毒溪取魚是所謂茶毒也釋草云茶委葉疏薺拔去田草也王肅說詩茶陸穢草然則茶者原田蕪穢之草非衛風之苦菜也埤雅茶



陸草也蓼水草也以薺荼蓼則高下無所不治且因暑  
雨化之則草不復生而地益美蓋非特去草之害亦以  
釀其田疇故荼蓼朽止黍稷於是茂止也月令季夏燒  
薺行水利以殺草如以熱湯可以糞田疇可以美土疆  
正此謂矣

薄采其茆

朱傳茆鳧葵也葉大如手赤圓而滑江南人謂之萑菜  
者也說文茆鳧葵詩言采其茆力久切周禮醢人朝事

之豆茆蒹藿注茆鳧葵釋文茆音卯北人音柳鄭大  
夫又讀為芽干寶云今之鰾躑草鄭小同云江東人名  
萆菜生陂澤陸疏茆與苧菜相似葉大如手赤圓有肥  
者著手中滑不得停莖大如匕柄葉可生食又可煮滑  
美或謂之水葵諸陂澤水中皆有何承天云此菜出東  
海堪為蒹醬不可用蜀本圖經萆生水中葉似鳧葵浮  
水上採莖堪噉花黃白子紫色三月至八月莖細如釵  
股黃赤色短長隨水深淺名為絲萆又曰穉萆又名雉

尾萼九十月漸粗硬十一月萌在泥中名塊萼體苦澀  
惟取汁味唐本草注萼菜三四月後通名萼絲霜降以  
後名塊萼塊萼為羹猶勝襍菜塊萼一名龜萼顏之推  
云蔡朗父名純改萼為露葵後人遂有誤以露葵為萼  
者吳地志云靈岩池有莼吳中以為佳品即萼也萼入  
秋為油萼故張翰思之草木疏又名水炙一云今之浮  
菜西陽襍俎萼菜之根絕美江東人謂之萼龜雞跖集  
萼四月始莖而未葉名為雉尾萼本草有鳧葵洪景以

入有名無用品解者不同未詳其正卉譜蓴一名茆一  
名錦帶一名水葵一名馬蹄草生湖澤中以水淺深為  
候水深則莖肥而葉少水淺則莖瘦而葉多其葉如荇  
菜而差圓形似馬蹄夏月開黃花結實青紫大如棠梨  
中有細子張爾公云荇一名鳧葵陸璣言茆與荇似不  
言即荇也干寶言茆一名水炙不言即蓴也鳧葵即荇  
菜蓴別一物圖經言蓴葉似鳧葵顏氏言荇菜黃葉似  
蓴雅翼言蓴小於荇其說甚明周禮茆菹注亦云鳧葵

也正韻引鄭小同云茆即萑菜毛傳朱傳博雅皆然至  
今因之遂誤為一物矣按古卯作𠂔西作𠂔許慎用詩  
叶音讀若柳亦至今因之誤茆茆為一字矣通雅云本  
草女茆一名茆音柳女茆名茆不審何據或者方俗之  
稱猶茆之為萑菜鳧葵未可盡信也

植穉菽麥

朱傳先種曰植後種曰穉韓詩說植長稼也穉幼穉也  
說文植早種也穉幼禾正義重穉植穉生熟早晚之共

稱耳非穀名當謂先種先熟後種後熟但毛傳畧不言  
其熟凡物幼小皆曰穉鄘風衆穉且狂管子重令篇菽  
粟不足禾生不禁而工以雕文刻鏤相穉也謂之逆註  
穉驕也

詩傳名物集覽卷十